

fivis applicant, ut insoliti effectus inde oriantur, qui mirabiles dici solent, cum homines non satis assequi possint eorum productionem, miracula tamen non sunt, quia fiunt ab agentibus naturalibus.

§. 71. De sagis disputari solet, an verè de locò in locum transportentur à Diabolo; an verò per præstigias Diabolicas vis imaginativa sagarum immutetur, ut videantur sibi transferri ad campos aut locos, in quibus cum aliis conveniunt, quamvis re ipsa domi in lectò suo sint maneantque. Sanè uterque modus possibilis est, & probabile est, interdum sagarum phantasia immutari, ut putent se ad communem sagarum locum verè translatos esse. Quod autem interdum verè transferantur, probabile reddunt varii casus, quibus extra domum suam Sagis varia obvenisse incommoda, vulnera & alias mutationes passim historiæ memorant. Quicquid tandem sit, sive verè transportentur, sive per præstigias Diabolicas se transportari existiment, re ipsa tamen casu in utroque Diabolo serviunt, eique *datâ operâ* servientes peccantesque morte dignæ sunt. Et quia incertum est, verè transportentur ad congregationes aliarum Sagarum, an per præstigias Diabolicas sibi videantur transferri, illorum testimonio, quando in conventiculis suis alias mulieres se vidisse, easque esse sagas testantur, nihil vel parum tribuendum est. Si enim non transferantur verè, sed videntur sibi transferri per præstigias Diabolicas tunc planè nihil tribuendum est ipsorum testimonio; sicut enim Diabolus mendax est & Pater Mendacii, ita periculum maximum est, ne sagarum facultati imaginativæ obijciat species mulierum, quæ sagæ non sunt, & videantur sibi videre mulieres in sagarum numerò, quas non vident. Si autem verè transportentur ad locum conventus, tunc fieri facile potest, ut Diabolus ibi etiam turbet illarum phantasias

K

&